

आकाशवाणी जयपुर-अजमेर

प्रादेशिक समाचार

- जोधपुर जिला रा शेरगढ हलका मांय गैस सिलेंडर फाटण रा हादसा मांय मरण वाळां री तादाद सात व्ही- जोधपुर मांय 47 पीडितां रो ईलाज चाले।
- मुख्यमंत्री अशोक गहलोट हादसा मांय मरण वाळां रा पिरवारजनां ने सात-सात लाख रिप्या री मदद देवण रो ऐलाण करयो।
- प्रधानमंत्री नरेंद्र मोदी यूपीए अध्यक्ष सोनिया गांधी ने जन्मदिन माथे बधाई दी- श्रीमती गांधी रणथम्भौर मांय जन्मदिन मना री है।
- राष्ट्रपति द्रौपदी मुर्मू कयो- शिक्षा ई आखा देश मांय बदलाव ला सके है- देहरादून मांय दून विश्वविद्यालय रा तीजा दीक्षांत जळसा ने सम्बोधित कर्या।

अर

- केन्द्र सरकार खास आर्थिक क्षेत्र रा सगळा कर्मचारियां ने आवती साल 31 दिसम्बर ताई वर्क फ्रॉम होम री मंजूरी दी।

000

जोधपुर जिला मांय शेरगढ रा भूंगरा गांव मांय ब्याव रा जळसा मांय गैस सिलेंडर फाटण रा हादसा मांय मरण वाळां री तादाद सात व्हे ग्यी है। काल दो टाबरां री मौका माथे ई मौत व्हे ग्यी ही। आग ऊं झुलसी तीन बालिकावां अर दो महिलावां री मोडी रात जोधपुर मांय इलाज रे दौरान मौत व्हे ग्यी। झुळस्या 47 लोगां रो जोधपुर रा महात्मा गांधी सफाखाना मांय ईलाज चाल रयो है जिण मांय 20 री हालत गंभीर चिंताजोग बताई ज्यी है। ई हादसा मांय केई लोग 60 ऊं 90 फीसदी ताई बळ ग्या है। बारात रवानगी ऊं पैला ई गैस सिलेंडर मांय रिसाव रे पछे आग लागी अर दो गैस सिलेण्डर फाट ग्या हा। इण भीषण अग्निकांड मांय घर परिवार अर रिश्तेदारी रा 54 लोग झळस ग्या हा। मुख्यमंत्री अशोक गहलोट जोधपुर रा सफाखाना मांय पीडितां अर वां रा पिरवार वाळां ऊं मिल्या अर वां ने ढाढस बंधायो। वणा डॉक्टरां ने घायलां रो वाजिब ईलाज करण रा निर्देश दिया। मुख्यमंत्री खबरनवीसां ने बतायो के अग्निकांड मांय मरण वाळां रा आश्रितां ने पांच-पांच लाख रूप्या री मदद मुख्यमंत्री चिरंजीवी योजना रे तैत मिळेली। इण रे अलावा दो लाख रिप्या रो और फण्ड दियो जाएला। वणा हादसा मांय चिंताजोग घायल अर दूजा घायल लोगां ने एक-एक लाख रिप्या री मदद दी जाएला। मुख्यमंत्री भूंगरा हादसा मांय पूरी सूझबूझ अर साहस दिखावण वाळा कांस्टेबल डूंगर सिंह ने वां री कर्तव्यनिष्ठा सारू हैड कांस्टेबल ओहदा माथे गैलंट्री/आउट ऑफ टर्न प्रमोशन देवण रो ऐलाण कर्यो है। नागौर सांसद हनुमान बेनीवाल ई इण हादसा रा पीडिता ऊं सफाखाना मांय हालचाल पूछ्या।

000

प्रधानमंत्री नरेंद्र मोदी यूपीए अध्यक्ष सोनिया गांधी ने वां रा जन्म दिन माथे बधाई दी है। एक संदेश मांय श्री मोदी वां रा लम्बा अर स्वस्थ जीवन री कामना करी। श्रीमती गांधी आपरो जन्मदिन रणथम्भौर मांय मना री है। श्रीमती गांधी आज सिज्यां री पारी मांय रणथम्भौर राष्ट्रीय उद्यान रो भ्रमण करयो। ई दौरान राहुल गांधी, प्रियंका वाड्रा अर रोबर्ड वाड्रा समेत दूजा पिरवारजन वां रे साथे रिया। श्री गांधी री भारत जोड़ो यात्रा काले बूंदी जिला रा गुडली पूगी ही। वटे ऊं हैलीकॉप्टर री मार्फत वे रणथम्भौर पहुंच्या। यात्रा रो आज विराम रियो। यात्रा काले संवारा केशवरायपाटन उपखण्ड रा गुडली गांव ऊं फेरू सरू व्हेला अर इण मांय फगत महिलावां शामिल व्हेला। बूंदी जिला कलेक्टर यात्रा ने ले र बन्दोवस्तां रो जायजो लियो। सवाईमाधोपुर जिला मांय भारत जोड़ो यात्रा ने ले र तैयारियां व्हे री है। सवाईमाधोपुर अर बामनवास विधानसभा हलका ऊं व्हे र निकळण

वाळी ई जातरा रा स्वागत भोज अर विश्राम सरीखा मुद्दां री तैयारियां ने आखिरी रूप दियो जा रियो है।

000

राष्ट्रपति द्रौपदी मुर्मू कयो है के शिक्षा ई आखा देश मांय बदलाव ला सके है। राष्ट्रपति आज देहरादून मांय दून विश्वविद्यालय रा तीजा दीक्षांत जळसा मांय बोल री ही। वणा कयो के देश आत्मनिर्भरता कानी बध रियो है जिण सारू पढेसरियां री प्रतिबद्धता जरूरी है। राष्ट्रपति मुर्मू कयो के वसुधैव कुटुम्बकम री धारणा रे कारण आज आखी दुनिया भारत कानी देख री है। राष्ट्रपति द्रौपदी मुर्मू कयो के मायड भाषा आपा री पहचान है। दून विश्वविद्यालय मांय विदेशी अर स्थानीय भाषावां मांय सिखावण री सराहना करता वणा विश्वविद्यालय मांय जनसांख्यिकी अनुसंधान केंद्र री थापना ने एक चोखो कदम बताया।

000

इण ऊं पैला राष्ट्रपति आज मसूरी मांय लालबहादुर शास्त्री राष्ट्रीय प्रशासनिक अकादमी रा 97वां फाउंडेशन कोर्स रे पूरा होवण रा जळसा मांय बोल री ही। वणा जलवायु परिवर्तन ऊं पैदा चुनौतियां माथे चिंता जतावता कयो के सरकारी योजनावां ई तरीका ऊं लागू करी जावे के पर्यावरण री हिफाजत तैय करी जा सके। वणा सीख लेवणियां अहलकारां ने बतायो के लगस हासिल करण सारू जरूरी है के समाज रा वंचित वर्गां ने ध्यान मांय राखता फ़ैसला लेवणा चाहिजे। इण ऊं पैला राष्ट्रपति मुर्मू काले रात देहरादून मांय नौ विकास परियोजनावां री नींव धरी। आं परियोजनावां माथे कोई दो हजार एक करोड रिप्या री लागत आवेला।

000

केन्द्र सरकार कयो के संसद अर राज्य विधानसभावां मांय महिलावां री नुमाइन्दगी ने बधावण रा मुद्दां माथे सगळा सियासी दलां री आम सहमति रा आधार माथे सावधानी ऊं विचार करण री जरूरत है। सरकार ई बारा मांय संविधान मांय संशोधन सारू संसद मांय विधेयक लावण ऊं पैला सियासी दलां रे बीचे आम सहमति री जरूरत माथे जोर दियो। केंद्रीय विधि मंत्री किरें रिजिजू आज लोकसभा मांय लिखित सवाल रा जवाब मांय आ जाणकारी दीनी। ई सवाल मांय पूछी ज्यो के सरकार महिलावां री नुमाइन्दगी बधावण अर संसद मांय महिला आरक्षण विधेयक लावण रा बारा मांय काई कदम उठाया है। श्री रिजिजू कयो के लैंगिक न्याय सरकार री खास प्रतिबद्धता है।

000

राज्यसभा मांय आज समान नागरिक संहिता तैयार करण सारू राष्ट्रीय निरीक्षण अर अन्वेषण समिति बणावण अर संहिता ने देशभर मांय लागू करण सारू एक गैर सरकारी विधेयक पेश करी ज्यो। भारतीय जनता पार्टी रा सांसद डॉक्टर किरोड़ी लाल मीणा समान नागरिक संहिता विधेयक-2022 पेश करयो। मत विभाजन री बगत सदन रा 63 सदस्यां इण ने पेश करण रा पक्ष मांय अर 23 सदस्य इण री खिलाफत मांय वोट दियो। केई विपक्षी सांसदां विधेयक प्रस्तुत करण माथे आपत्ति जतायी।

000

केन्द्र सरकार खास आर्थिक क्षेत्र सेज रा सौ फीसदी कर्मचारियां ने 31 दिसम्बर 2023 ताई वर्क फ्रॉम होम -घर से काम करण री मंजूरी दे दी है। वाणिज्य अर उद्योग मंत्रालय कयो है के ओ फ़ैसलो उद्योग री सही जरूरतां अर टीयर -2 अर टीयर-3 शहरां री माली हालात ने फायदो पहुंचावण माथे विचार करण रे पछे ओ फ़ैसलो लीरी ज्यो है। मंत्रालय मानक परिचालन प्रक्रिया काढी है जिण ऊं सगळा आर्थिक जोन हलकां मांय संशोधित नियमां ने लागू करणो सुचारू बणायो जा सके।

000

न्यायिक अहलकार रे रेहवास माथे चतुर्थ श्रेणी कर्मचारी सुभाष मेहरा री मौत रा मामला मांय प्रदेश री नीचली अदालतां रा 17 हजार ऊं बत्ती कर्मचारी भेळी छुट्टी माथे चाल रह्या है। कर्मचारियां रे भेळी छुट्टी माथे रेहवण रे कारण जयपुर री अदालतां मांय 22 दिन अर दूजा जिलां री अदालतां मांय 10 दिन ऊं काम बंद है। कर्मचारी भेळी छुट्टी ले र धरना प्रदर्शन अर नाराबाजी कर रिया है। कर्मचारी मांगां नी मानी जावण ताई आन्दोलन चालतो राखणो रो फ़ैसलो कर्यो है। कर्मचारियां मांय अजे ताई मामला मांय एफआइआर दर्ज नी करण ने ले र नाराजगी है। दूजी कानी पुलिस आयुक्तालय ओ खुलासा कर्यो है के मामला री जांच पुलिस आयुक्त री देखरेख मांय चाल रह्यो है। अजे ताई री जांच मांय कर्मचारी रे आत्महत्या करणो ई सामी आयो है। एनडीपीएस मामलां री खास कोर्ट मांय कर्मचारी सुभाष मेहरा 10 नवंबर ने एक न्यायिक अहलकार रे रेहवास माथे कथित रूप ऊं आत्मदाह कर लियो

हो। न्यायिक कर्मचारियों को कहना है कि सुभाष की हत्या कही है। ई कारण एफआइआर दर्ज करण के साथे सीबीआइ जांच क्वैणी चाहिजे।

000

चित्तौड़गढ़ जिला मांय आज दो न्यारा-न्यारा हादसा मांय एक महिला समेत तीन लोगों की मौत क्वै गयी अर एक गहरो घायल क्वै गयो। मंडफिया थाना हलका मांय सांवलिया जी ऊं रदइखेडा ब्याव मांय जा रिया स्कूटी सवार एक मिनख अर दो टाबर रूखडा ऊं टकरा गया। हादसा मांय एक मिनख अर नाबालिग की मौका माथे ई मौत क्वै गयी अर गहरा घायल दूजा टाबर ने ईलाज सारू सांवलियाजी सफाखाना मांय भर्ती करायी ज्या है। एक दूजो हादसो भदेसर थाणा हलकां मांय चित्तौड़गढ़-उदयपुर हाईवे माथे सर्विस लेण के कने स्कूटी सवार एक महिला की कार की फेंट मांय आवण ऊं मौत क्वै गयी।

000

करौली जिला मांय पंचायती राज महकमा, सांख्यकी महकमा यूनिसेफ अर पीसीसीआरसीएस रा भेळा सहयोग ऊं राज्य सरकार कानी ऊं चलायी जाए की बाल हितैषी पंचायत संकल्प अभियान रथ ने सीईओ हरी झण्डी दिखा र मण्डरायल पंचायत समिति रा ग्राम पंचायतां सारू रवाना कर्या। ओ अभियान मण्डरायल हलका की पंचायतां मांय जाग जगावण के संदेश देवेला। ध्यान जोग है के बाल दिवस के मौके मुख्यमंत्री अशोक गहलोत सगळा 33 जिलां सारू ई अभियान की सरूआत करी ही। ई अभियान के मकसद टाबरां रा मुद्दां ने पंचायतां की ग्राम विकास योजनावां मांय भेळो करणो है।

000

कोटा मांय नुवा बण्या ऑक्सीजन सिटी पार्क मांय पढेसरां अर आमजन, विज्ञान के समझण के साथे अंतरिक्ष रा रहस्य जाण सकेला। ई सारू 35 करोड रिप्या ऊं बत्ती की लागत ऊं साइंस सेन्टर अर प्रदेश रा पैला डिजिटल प्लेनेटोरियम बनायो जाएला। लोकसभा अध्यक्ष ओम बिरला की कोशिश ऊं नेशनल काउंसिल ऑफ साइंस इण ने बणावण सारू मंजूरी दे दी है।

000